



Schweizerische Eidgenossenschaft  
Confédération suisse  
Confederazione Svizzera  
Confederaziun svizra  
  
Swiss Confederation

Departament federal da l'intern DFI  
Uffizi federal da sanadad publica UFSP



Nov coronavirus


Actualisà ils 01-08-2020

# USCHIA ANS PROTEGIN NUS.



**Infurmaziuns impurtantas davart il nov coronavirus e davart las reglas da cumportament e d'igiena.**


Obligaziun da purtar ina mascrina en il traffic public



Resguardai vinavant las reglas d'igiena e da cumportament. Il nov coronavirus na duai numnadaman betg sa derasar danovamain.



Sa laschar testar immediatamain e restar a chasa en cas da sintoms.



Sche pussaivel adina inditgar las datas da contact per la retrofastisaziun.



Sch'il test è positiv: isolaziun.



Tegnair distanza.



Lavar bain ils mauns.



Evitar da dar il maun.



Tusser e starnidar en in faziolet u en la foppa dal cumbel.



S'annunziar per telefon avant che ir tar il medi u a la staziun d'urgenza.

# Las dumondas e las respostas las pli frequentas davart il nov coronavirus

Perquai che las mesiras per proteger la populaziun cunter il nov coronavirus èn veginadas schluccadas, sa trategnan puspè dapli umans en il spazi public. Il Cussegl federal sa basa er en il futur fermamain sin in agir en atgna responsabladad. Las reglas da distanza e d'igiena sco er ils concepts da protecziun restan centrals e duain gidar d'impedir novas infecziuns ed uschia in cler augment dal dumber da cas.

Ina ristga considerabla da s'infectar exista, sche la distanza dad 1,5 meters na po betg veginir observada. Oravant tut en il traffic public po quai adina esser il cas. En vista al traffic da viadi crescent ed en vista al dumber da cas che s'augmentà dapi mez zercladur ha il Cussegl federal rinforzà las mesiras da protecziun ed introduci in'obligaziun da purtar ina mascrina en tut ils meds dal traffic public a partir dals 6 da fanadur 2020.

**L'atgna responsabladad resta impurtanta:** Cunter ina infecziun As protegis Vus il meglier, sche Vus lavais ils mauns regularmain cun savun e sche Vus tegnais distanza.

## Infecziun e ristgas

Pertge èn questas reglas d'igiena e da cumportament uschè impurtantas?

Il nov coronavirus è in nov virus, cunter il qual l'uman n'ha anc **nagina defensiun immunitara. I po dar bleras infecziuns e malsognas.** Perquai stuain nus franar uschè bain sco pussaivel la derasaziun dal nov coronavirus. Spezialmain persunas cun ina pli gronda ristga da veginir grevamain malsaunas ston veginir protegidias.

Persunas spezialmain periclitadas èn:

- persunas sur 65 onns
- crescids cun las suandardas malsognas preexistentas:
  - **pressiun dal sang auta,**
  - **malsognas cronicas da la via respiratoria,**
  - **diabetes,**
  - **malsognas e terapias che flaivlentan il sistem d'immunitad,**
  - **malsognas dal cor e da la circulaziun e**
  - **cancer**

U cun:

- **surpresa severa (corpulenza, BMI da 40 e dapli)**

En cas che Vus essas malsegira u malsegir, sche Vus tutgais tar las persunas spezialmain periclitadas, As drizzai per plaschair a Vossa media u a Voss medi.

Sche nus tuts observain las reglas da cumportament e d'igiena, pudain nus proteger meglier questas persunas. Tras quai pon er persunas cun grevas malsognas veginir tractadas vinavant bain en las instituziuns da sanedad. En las staziuns intensivas è il dumber da stanzas da tractament e d'apparats da respiraziun numnadamain limità.

Avais Vus sur 65 onns ubain ina u pliras da las malsognas preexistentas numnadas qua survart?

Alura vali da prender las suandardas mesiras:

- Vus pudais bandunar Voss dachasa, uschè ditg che Vus resguardais strictamain las reglas d'igiena e da cumportament. Evitai lieus cun bleras persunas (per exemplu staziuns, traffic public) e temp da grond traffic (per exemplu ir a far las cumpras la sonda, traffic pendular).
- Evitai contactsunnecessarys e tegnai distanza d'autras persunas (almaim 1,5 meters).
- Laschaj sche pussaivel furnir virtualias ed auters products indispensabels d'ina amia, d'in ami u d'ina vischina resp. d'in vischin u d'in servetsch da furniziun. Er differentas organisaziuns, las vischnancas e l'internet porschan sostegn.
- Duvrai sche pussaivel per scuntradas privatas u da fatschenta il telefon, Skype u in med d'agid sumegliant.

Sche Vus stuais ir tar il medi, prendai Voss auto u Voss velo u gai a pe. Sche quai n'è betg pussaivel,

clamai in taxi. Tegnai almain 2 meters distanza d'autras persunas e resguardai las reglas d'igiena.

### **Recumandaziun: Purtar ina mascrina, sch'i n'è betg pussaivel da tegnair distanza.**

Sche Vus avais in'activitat professiunala ed essas pericitada resp. pericità pervia d'ina malsogna preexistenta, As sto Voss patrun proteger.

Avais Vus in u plirs sintoms sco tuss (per il solit tuss setga), mal la gula, respiraziun asmatica, fevra, sentiment da fevra, mal ils musculs u perdita andetga da l'odurat e dal palat? **Alura contactai immediatamain Vossa media/Voss medi u in ospital. Er la fin d'emna.** Descrivai Voss sintoms e schai che Vus tutgais tar las persunas spezialmain pericitadas.

### Co vegn transmess il nov coronavirus?

Il nov coronavirus vegn transmess principalmain tar in contact stretg e pli lung: sch'ins tegna damain che 1,5 meters distanza dad ina persuna infectada.

La transmissiun succeda

- tras **guttins**: sche la persuna malsauna **starnida u tussa**, pon ils virus cuntanscher directamain la pel mucosa dal nas, da la bucca u dals eglis d'autras persunas.
- sur **ils mauns**: guttins infectus dal tusser e dal starnidar pon sa chattar sin ils mauns u sin autras surfatschias. Els cuntanschan la bucca, il nas u ils eglis, sch'ins tutga en quels.

### Cura è ina persuna infectusa?

Resguardai: Tgi ch'è s'infectà cun il nov coronavirus è infectus durant in lung temp. Numnadomain:

- **gia dus dis avant** ch'ils sintoms cumenzan – pia avant ch'ins percorscha ch'ins è infectà,
- **durant ch'ins ha sintoms èn ins spezialmain infectus**,
- **fin almain 48 uras suenter** ch'ins sa senta puspè dal tuttafatg saun. Tegnai perquai vinavant distanza e lavai regularmain ils mauns cun savun.

## **Sintoms, diagnosa e tractament**

### Tge sintoms sa mussan tar ina infecziun cun il nov coronavirus?

Ils sustants sintoms cumparan savens:      Ultra da quai èn pussaivels ils sustants sintoms:

- |   |  |
|---|--|
| <ul style="list-style-type: none"><li>• tuss (per il solit tuss setga)</li><li>• mal la gula</li><li>• respiraziun asmatica</li><li>• fevra, sentiment da fevra</li><li>• perdita andetga da l'odurat e dal palat</li></ul> | <ul style="list-style-type: none"><li>• mal il chau</li><li>• deblezza e malesser</li><li>• sintoms dal tract digestiv (indispostedad, vomitar, diarrea, mal il venter)</li><li>• dafraid</li><li>• mal ils musculs</li><li>• eczems</li></ul> |
|---|--|

Ils sintoms èn da differenta grevezza e pon er esser levs. Pussaivlas èn er cumplicaziuns sco per exemplu ina pneumonia.

Sche Vus avais in u plirs dals sintoms frequents, essas Vus eventualmain infectada resp. infectà cun il nov coronavirus.

### **En quest cas:**

- Restai a chasa.
- **Faschai il check coronavirus (guarda ils web-links en la proxima dumonda) u telefonai a Vossa media u a Voss medi. Respundai il meglier pussaivel tut las dumondas en il check online u al telefon. A la fin survegnis Vus ina recumandaziun da cumporment ed eventualmain la directiva da far il test.**
- **Legiai las instrucziuns davart «l'isolaziun» ([www.bag.admin.ch/neues-coronavirus-downloads](http://www.bag.admin.ch/neues-coronavirus-downloads)) e las resguardai consequentamain.**

Sche Vus avais sur 65 onns u ina malsogna preexistenta, vala: Contactai en cas d'in u da plirs dals sintoms frequents immediatamain ina media u in medi. Er la fin d'emna.

### Essas Vus malsegira resp. malsegir, co che Vus duais As cumportar?

Cun il check coronavirus sin <https://check.bag-coronavirus.ch/screening> retschavais Vus – suenter

che Vus avais respundi ad intginas paucas dumondas – ina recumandaziun da cumportament da l'Uffizi da sanadad publica (en tudestg, franzos, talian ed englais).

Sin la pagina d'internet dal chantun Vad chattais Vus sin <https://coronavirus.unisante.ch/evaluation> in check coronavirus en 8 ulteriuras linguas.

Il check coronavirus na remplazza betg ina cussegiazion, ina diagnosa u in tractament professiunal medicinal. Ils sintoms descrits en il check coronavirus pon er sa mussar en connex cun autres malsognas che basegnan in auter andament.

Contactai adina ina media u in medi, en cas da sintoms severs che sa pegiureschan u ch'As fan quitads.

#### Co vegn tractada ina infecziun cun il nov coronavirus?

Il tractament sa limitescha a la mitigiaziun dals sintoms. Per proteger autres persunas vegnan isoladas las persunas malsauñas. En cas d'ina ina greva malsogna dovrà in tractament en la staziun intensiva d'in ospital. Eventualmain dovrà ina respiraziun artifiziala.

#### Avais Vus mal, il sentiment d'esser malsauña resp. malsauñ u sintoms che na stattan betg en connex cun il coronavirus?

Malesser, malsognas e sintoms che n'han da far nagut cun il coronavirus ston vinvant vegnir prendids serius e vegnir tractads. As laschai gidar e na spetgai betg memia ditg: Contactai ina media u in medi.

#### Cura stoss jau ma laschar testar sin il nov coronavirus?

As sentis Vus malsauña resp. malsauñ u avais Vus sintoms dal nov coronavirus? Restai a chasa, faschai il check coronavirus u contactai Vossa media u Voss medi. Respundi tut las dumondas en il check online u al telefon uschè bain sco pussaivel. A la fin retschavais Vus ina recumandaziun da cumportament ed eventualmain l'ordinaziun d'As laschar testar. Restai a chasa fin ch'il resultat dal test è avant maun.

#### Nua ma poss jau laschar testar?

Ils tests vegnan fatgs da medias e medis, d'ospitals u da centers da testar. Vus pudais far il check coronavirus. Sch'il test As recumonda d'As laschar testar, retschavais Vus instrucziuns, co che Vus stuais proceder.

La pagina d'internet [www.ch.ch/coronavirus](http://www.ch.ch/coronavirus) (en tudestg) renviescha a las paginas d'internet chantunalias, nua che Vus chattais infurmaziuns en connex cun il nov coronavirus sco er adressas da contact.

#### En tge cas surpiglia la Confederaziun ils custs per in test?

Dapi ils 25 da zercladur 2020 surpiglia la Confederaziun ils custs per in test (=test da PCR molecularbiologic), sch'ils criteris dal UFSP vegnan ademplids. Quai è per exemplil il cas, sche Vus avais sintoms che stattan en connex cun COVID-19 e sche Vossa media u Voss medi ordinescha il test sin ina infecziun cun il nov coronavirus. In'annunzia da l'app SwissCovid davart il contact cun ina persuna infectada vala medemamain sco criteri.

Sch'ils criteris per in test dal UFSP na vegnan betg ademplids, na surpiglia la Confederaziun nagins custs per in test. Quai po esser il cas, sche Vus duvrais per exemplil il resultat d'in test per in viadi u sch'il test vegn manà tras unicamain sin giavisch da Voss patrun.

## Ulteriuras infurmaziuns

Tge occurrenzas èn permessas?

**Permessas èn occurrenzas privatas e publicas fin 300 persunas.** Quai èn occurrenzas sco eveniments da famiglia, messas, concerts, represchentaziuns da teater e preschentaziuns da films, manifestaziuns politicas e civicas sco er occurrenzas da sport ed activitads d'uniuns.

**Occurrenzas privatas ed eveniments da famiglia:** Talas occurrenzas pon avair lieu er ordaifer ils secturs d'abitar privats e na dovran betg in concept da protecziun. L'organisatura u l'organisatur sto dentant far ina glista da preschientscha cun las datas da contact (prenum e num, numer da telefon).

**Occurrenzas publicas sco er occurrenzas da sport e concurrenzas:** Per talas occurrenzas dovri concepts da protecziun.

**Resguardai:** La distanza e l'igiena ston esser garantidas per proteger las personas preschentas.

Tge succeda, sche la quantitat da las novas infecziuns na sa reducescha betg, mabain s'augmenta puspè?

I dependa co che la situazion sa sviluppa. Sche las novas infecziuns s'aumentan puspè, vegn il Cussegli federal a spustar pass da schluccada planisads, resp. ad abolir schluccadas gia introducidas. Er en quai che reguarda ils concepts da protecziun ston ins alura far adattaziuns.

## Chattar agid.

Tge poss jau far, sche mia lingua na vegn ni discurrida ni chapida en l'ospital?

Dumandai dapi il cumenzament per ina interpreta u in interpret. I dat er servetschs d'interprets per telefon. Sch'i vegnan engaschads interpretas u interprets professiunals, na ston Voss confamigliars betg vegnir cun Vus. Uschia vegnan els protegids cunter ina infecziun. Vus avais il dretg da chapir e da vegnir chapida resp. chapì en cas d'intervenziuns medicinalas.

Stuails Vus restar a chasa e duvrals Vus victualias u medicaments?

U vulais Vus gidar insatgi?

Guardai en Vossa vischinanza:

- Pudessas Vus dumandar insatgi per agid?
- U pudess insatgi duvrar Voss agid?

Ulteriuras pussaivladads:

- As drizzai a Vossa administraziun communal u municipal
- faschai diever da l'app «Five up»
- guardai sin [www.hilf-jetzt.ch](http://www.hilf-jetzt.ch)

Qua vala vinavant: Las reglas da comportament e d'igiena ston vegnir resguardadas da tut temp.

Avais Vus uffants?

Ils uffants na duain betg vegnir pertgirads dal tat e da la tatta resp. dal non u da la nona u d'autras personas spezialmain periclitadas. Ils uffants na **duain betg giugar en gruppas da passa tschintg.**

Els pon vinavant giugar en gruppas, però adina cun il medems uffants. E durant ch'ils uffants giogan ensemens, na duain ils geniturs betg s'inscuntrar en gruppas.

Faschais Vus quitads u duvrals Vus insatgi per discurrer?

Qua chattais Vus las infurmaziuns correspondentes:

- en l'internet sin [www.dureschnufe.ch](http://www.dureschnufe.ch) / [www.santepsy.ch](http://www.santepsy.ch) / [www.salutepsi.ch](http://www.salutepsi.ch)
- cussegliazion telefonica sut il numer da telefon 143 (il Maun offert)
- 

As sentis Vus en privel a chasa, tschertgais Vus agid u protecziun?

- Numers da telefon ed adressas dad e-mail per cussegliazions anonimas e per protecziun en tut la Svizra chattais Vus sin [www.opferhilfe-schweiz.ch](http://www.opferhilfe-schweiz.ch) / [www.aide-aux-victimes.ch](http://www.aide-aux-victimes.ch) / [www.aiuto-alle-vittime.ch](http://www.aiuto-alle-vittime.ch).
- Clamai en **cas d'urgenza** la polizia sut il numer da telefon **117**.


Ulteriurs numers da telefon impurtants:

- **L'alarm sanitär** (ambulanza) **144**: Quest servetsch stat a disposizion da tuttas uras per tut ils cas d'urgenza medicinals en tut la Svizra.
- La **infoline** davart il nov coronavirus: Sut il numer **058 463 00 00** vegni respundi a dumondas davart il nov coronavirus.
- **Sche Vus n'avais nagina media da chasa resp. nagin medi da chasa: Medgate As** stat a disposizion sut il numer **0844 844 911** mintga di ed er la notg.

## Returnar a la piazza da lavur

Il Cussegl federal cussegli da lavurar sche pussaivel vinavant da chasa anora, era per evitare autas frequenzas en il traffic public. Voss patrun da lavur decida dentant, sche e cura che Vus duessas turnar al lieu da lavur.

Sche Vus lavurais ed essas periclitada resp. periclità pervia da malsognas preexistentas, sto Voss patrun da lavur As proteger.



## Obligaziun da purtar ina mascrina en il traffic public

### Nua vala l'obligaziun da purtar ina mascrina?

L'obligaziun da purtar ina mascrina vala en tut il traffic public, pia en trens, en trams, en bus, ma er en pendicularas u sin bastiments. Exceptads èn runals e sutgeras.

### Datti excepcions per uffants pitschens e per autres persunas?

Uffants sut 12 onns èn exceptads da l'obligaziun da purtar ina mascrina. Ultra da quai èn persunas che na pon betg purtar ina mascrina per motivs speziali, oravant tut per motivs medicinals, exceptadas da l'obligaziun da purtar ina mascrina.

### Stoss jau purtar ina mascrina, sch'il tren u il bus è mez vid?

L'obligaziun da purtar ina mascrina vala independentament dal dumber da persunas ch'è en gir cun il traffic public. Ins na sa betg ordavant, quantas persunas che veggan ad entrar en il med public. En vista al traffic per motivs da lavur sco er al traffic da temp liber durant il temp da vacanzas stoi da principi vegnir fatg quint cun bleras viagiaturas e blers viagiaturas.

### Sche jau n'hai nagina mascrina: poss jau er metter il schal sur la bucca e sur il nas, u in autre toc taila?

Na, cun in schal u cun in toc stoffa na vegg betg ademplida l'obligaziun da purtar ina mascrina. In schal na protegia betg avunda cunter ina infecziun ed ha er ina protecziun limitada per las autres persunas. I sto veggir purtada ina mascrina d'igiena u ina mascrina da textil producida en moda industriala.

### Tgi controlla, sche las passagieras ed ils passagiers portan ina mascrina?

La controlla e l'execuziun succedan tras il personal dal tren e tras la polizia da viafier resp. tras ils servetschs da segirezza.

### E sche jau refus da purtar ina mascrina?

Tgi che refusa da purtar ina mascrina, sto bandunar il med da transport a la proxima staziun. Sch'ina persuna sa dosta cunter las supplicas da las persunas da segirezza e na banduna betg il med da transport, po ella survegnir ina multa pervia d'insubordinaziun (sin via d'ina procedura da multa normala, betg ina multa disciplinara).

### Durant in lung temp ha il UFSP insistì sin la constataziun che mascrinas na protegian betg persunas saunas en il spazi public. Pertge daventan ellas ussa tuttina obligatoricas?

Tgi che porta ina mascrina, protegia ils auters. Tgi ch'è infectà, po esser contagius – senza savair quai – gia 2 dis avant ch'ils sintoms sa mussan. Sche tuts portan ina mascrina en cas da relaziuns da spazi stretgas, vegg mintga persuna protegida da las autres. Er sch'i na po betg vegnir garantida uschia ina protecziun da 100 pertschient, vegg uschia ralentada la derasaziun dal virus.

## Viadis / entrada en Svizra


Dapi ils 6 da zercladur 2020 essas Vus obligada resp. obligà d'As metter en quarantina per 10 dis en Svizra, cur che Vus veginis da tschertas regiuns.

Questa mesira sa basa sin l'Ordinaziun davart las mesiras per cumbatter il nov coronavirus (COVID-19) en il sectur dal traffic da persunas internazional e vala, sche Vus veginis da pajais u da regiuns cun ina ristga elevada d'ina infecziun cun il coronavirus.

Annunziai Vossa entrada a l'autoritat cumpetenta chantunala entaifer dus dis e resguardai las instrucziuns da questa autoritat. Ils custs da la quarantina ston vegnir surigliads da las viagiaturas e dal viagiaturi sezs.

Tgi che refusa la quarantina u n'observa betg l'obligaziun d'annunziar, commetta tenor la Lescha d'epidemias in surpassament che vegin chastià cun ina multa da fin 10 000 francs.

La glista dals pajais e da las regiuns cun ina ristga elevada d'ina infecziun cun il coronavirus, ils contacts chantunals sco er las excepcziuns da l'obligaziun da quarantina chattais Vus qua:  
[www.bag.admin.ch/einreise](http://www.bag.admin.ch/einreise)



### Tests da coronavirus e contact-tracing ferman chadainas d'infecziun.

#### Pertge èn las duas mesiras uschè impurtantas?

Per ch'i saja pussaivel da viver pli u main «normal», dessan tut ils umans cun sintoms da malsogna far immediatamain il test dal nov coronavirus – era sch'ils sintoms èn mo levs. Ultra da far il test èsi plinavant impurtant che tut ils umans mettian a disposiziun lur datas da contact per la retrofastisaziun, per exemplu en il restaurant. Persunas infectadas pon già esser contagiusas cur ch'ellas sa sentan anc saunas. Uschia ferman ils tests ed il contact-tracing las chadainas d'infecziun.

#### Sch'il test dal coronavirus è positiv, lura entschaiva il contact-tracing.

- Las autoritads chantunals erueschan cuminaivlamain cun la persuna infectada, cun tgi ch'ella ha gi streg contact.
- Las autoritads infurmeschan las persunas da contact davart in'eventuala infecziun e davart l'ulteriur proceder.
- Era sche questas persunas na mussan nagins sintoms, ston ellas ir en quarantina. Quai vala per diesch dis suenter il davos contact cun la persuna infectada. Legiai en quest connex las instrucziuns davart la quarantina ([www.bag.admin.ch/neues-coronavirus-downloads](http://www.bag.admin.ch/neues-coronavirus-downloads)) ed observai quellas consequentamain.
- Sch'i na vegn constatà nagina infecziun durant quest temp, aboleschan las autoritads puspè la quarantina.



## App SwissCovid

Cun sustegn da l'app SwissCovid per telefonins vulain nus franar la derasaziun nuncontrollada dal nov coronavirus. Dapli persunas che dovran l'app SwissCovid e meglier ch'ella gida en chaussa. Tgi ch'è sa trategni durant in temp pli lung en vischinanza d'almain ina persuna, da la quala il test sin il nov coronavirus è stà positiv pli tard, vegn infurmà via app davart ina infecziun pussaivla e davart l'ulteriur proceder. La sfera privata resta protegida. L'utilisazion da l'app è facultativa e gratuita. L'app po vegnir chargiada giu dal App Store dad Apple sco er dal Google Play Store.

### L'app SwissCovid gida a franar pli svelt las chadainas da transmissiun

L'app SwissCovid per telefonins (Android/iPhone) gida a franar il nov coronavirus. Ella cumplettescha il «contact tracing» classic, q.v.d. la retrofastisaziun da novas infecziuns tras ils chantuns, e gida pia a franar las chadainas da transmissiun.

L'app SwissCovid è disponibla en l'App Store ed en il Google Play Store (en las linguis: rumantsch, tudescht, franzos, talian, albanais, bosniac, croat, englais, portugais, serb, spagnol. Tirc e tigrinya suondan.)

- [Google Play Store per Android](#)
- [Apple Store per iOS](#)

L'utilisazion da l'app SwissCovid è facultativa e gratuita. Pli bleras persunas ch'installeschan e dovran l'app, e meglier ch'ella sustegna la franada dal nov coronavirus.

### Co funcziuna l'app SwissCovid?

Installai l'app SwissCovid sin Voss telefonin dad Apple u dad Android. Suenter na stuais Vus far nagut auter che purtar cun Vus il telefonin cun Bluetooth activà. Il telefonin emetta lura sur Bluetooth IDs codadas, uschenumnadas summas da controlla. Quai èn lungas chadainas da segns casuals. Suenter duas emnas vegnan tut las summas da controlla stizzadas automaticamain dal telefonin.

L'app mesira en furma anonima la durada e la distanza d'auters telefonins. Ella registrescha, sch'igl ha dà in **stretg contact** (pli datiers che 1,5 meters e totalmain pli ditg che 15 minutus durant in di). Lura èsi numnadomain pussaivel ch'il virus è vegnì transmess.

### Uschia vegn fatga l'annunzia

Sch'il test sin il coronavirus è stà positiv tar ina persuna che dovrà l'app SwissCovid, survegn ella in code (code covid) da las autoritads chantunalas. Mo cun quest code po la persuna activar la funcziun d'annunzia en sia app. Uschia avertescha ella otras persunas che dovran l'app, cun las qualas ella ha già stretg contact durant la fasa d'infecziun (dus dis avant il cumenzament dals sintoms da malsogna). Tras l'endataziun dal code vegnan questas persunas infurmadas en moda automatica ed anonima.

Las persunas infurmadas pon telefonar a la infoline ch'è inditgada en l'app e sclerir ils ulteriurs pass. En quest connex è la sfera privata garantida da tut temp. Sch'ina persuna infurmada ha già sintoms da malsogna, duai ella restar a chasa, evitar il contact cun outras persunas, far il check coronavirus u telefonar a sia media/ses medi.

Cun quest comportament solidaric pudain nus tuts gidar d'interrumper las chadainas d'infecziun.

### Protecziun da la persunalidad

Las datas che vegnan rimmadas da l'app SwissCovid, vegnan arcunadas mo localmain sin l'agen telefonin. L'app na trametta naginas datas da persunas u da localisaziun a lieus d'arcunaziun u a servers centrals. Perquai na po nagin reconstruir, cun tgi e nua ch'ins ha già contact. Cur che la crisa dal coronavirus è superada u sch'i sa mussa che l'app n'ha nagin effect, vegn il sistem mess ord funcziun.

### Da l'app SwissCovid hai jau survegnì in'annunzia ch'igl exista la pussaivladad d'ina infecziun. Hai jau il dretg d'in test?

Gea, uschespert che Vus avais survegnì in'annunzia davart ina infecziun pussaivla, pudais Vus laschar far gratuitamain in test.

Quest test duai identifitgar persunas ch'enèn già infectadas, ma che n'han anc nagins sintoms. Il test duess vegnir fatg il pli baud 5 dis suenter l'infecziun pussaivla.

Sche Voss test è positiv, As contactescha il post chantunal cumpetent ed As infurmeschà davart l'ulteriur proceder. Quai gida a franar la transmissiun dal virus.

**Survegn jau vinavant mes salari, sche jau ma decid da restar a chasa suenter in'annunzia davart ina infecziun pussaivla?**

Sche Vus avais survegnì in'annunzia davart ina infecziun pussaivla, telefonai per plaschair a la SwissCovid Infoline (il numer da telefon vegn mussà en l'app en cas d'ina annunzia). La infoline As po gidar en connex cun talas dumondas.

Da princip n'è il patrun betg obligà da pajar vinavant il salari, sche Vus restais a chasa sin fundament d'ina annunzia davart ina infecziun pussaivla.

Mo sch'ina quarantina vegn ordinada da las autoritads chantunalas cumpetentas, avais Vus il dretg da survegnir vinavant la paja.

## Tge è il nov coronavirus?

### Tge è SARS-CoV-2 e tge è COVID-19?

Il nov coronavirus è vegni scuvert la fin da l'onn 2019 en China causa in augment extraordinari da pneumonia en la citad Wuhan, en la China centrala. Il virus è vegni numnà SARS-CoV-2 e tutga tar la medema famiglia sco ils patogens dal «Middle-East respiratory syndrome» MERS e dal «severe acute respiratory syndrome» SARS.

Ils 11 da favrer 2020 ha l'Organisaziun mundiala da la sanadad OMS dà a la malsogna chaschunada dal nov coronavirus in num uffizial: COVID-19, l'abreviazion da «coronavirus disease 2019» ubain per rumantsch «malsogna dal coronavirus 2019».

Tenor las infurmaziuns ch'en actualmain avant maun vegni supponi ch'animals hajan infectà l'uman cun il virus e che quel vegnia ussa transmess dad uman ad uman. Il lieu d'origin è probablament in martgà da peschs e d'animals en la citad Wuhan che las autoritads chinas han serrà en il fratemps.

#### Ulteriuras infurmaziuns:

[www.bag-coronavirus.ch](http://www.bag-coronavirus.ch)

[www.bag.admin.ch/neues-coronavirus](http://www.bag.admin.ch/neues-coronavirus)

(tudestg, franzos, talian, englais)



Schweizerische Eidgenossenschaft  
Confédération suisse  
Confederazione Svizzera  
Confederaziun svizra

Swiss Confederation

Bundesamt für Gesundheit BAG  
Office fédéral de la santé publique OFSP  
Ufficio federale della sanità pubblica UFSP  
Federal Office of Public Health FOPH

